

UCAPAN PERDANA MENTERI DI MAJLIS  
PEMBUKAAN RASMI BANGUNAN TEKNIK  
DI JALAN MENTERI, KUALA LUMPUR  
PADA 28HB JULAI, 1972

Tuan Pengerusi, Dif-dif Terhormat, Tuan-tuan dan Puan-puan.

Saya berasa bangga kerana diberi penghormatan untuk merasmikan pembukaan Bangunan Kesatuan Perkhidmatan Teknik yang dikenal sebagai Bangunan Teknik Malaysia Barat ini.

Saya mengucapkan tahniah kepada pihak Kesatuan kerana sanggup mendirikan bangunan yang begitu indah, yang merupakan batu tanda penting dalam sejarah Kesatuan ini sejak ditubuhkan dua puluh dua tahun dulu.

Bangunan baru ini sudah tentu dapat memenuhi hasrat ahli-ahlinya yang berjumlah kira-kira 2,500 orang, di samping melambangkan semangat kerjasama dan hubungan erat di kalangan ahli-ahli Kesatuan di masa lepas.

Sebagai salah satu Kesatuan Kebangsaan yang terdiri dari kakitangan Kerajaan, saya gembira melihat ahli-ahli Kesatuan daripada golongan pegawai dan bawahan dapat menunjukkan perpaduan dan keazaman sehingga berjaya mendirikan sebuah bangunannya sendiri. Saya berharap Kesatuan ini akan terus mengekalkan perpaduan dan harmoni di masa hadapan.

Setiap pertubuhan perlu mempunyai bangunannya sendiri untuk mengurus pentadbiran dan menjalankan aktiviti-aktivitinya. Bangunan yang lengkap ini akan memberi serba kemudahan kepada ahli-ahli Kesatuan untuk mempergiatkan lagi usaha-usaha mereka di semua lapangan. Saya faham salah satu daripada tugas-tugas Kesatuan ini ialah membela hak dan kepentingan ahli-ahlinya. Tetapi sukalah saya menarik perhatian tuan-tuan supaya janganlah bangunan ini menjadi lambang untuk kegiatan Trade Union semata-mata. Adalah mustahak juga Kesatuan ini mempergiatkan aktiviti-aktiviti dalam lapangan lain-lain seperti sukan dan sosial dan apa-apa aktiviti yang memberi faedah kepada masyarakat dan negara.

Tuan-tuan dan Puan-puan,

Kesatuan ini mempunyai sejarah yang agak lama iaitu semenjak Trade Unionism mula bergerak di negara ini selepas Peperangan Dunia Kedua. Pada awal sejarahnya, Kesatuan ini hanya bertujuan memperjuangkan tangga gaji dan mendapatkan layanan-layanan yang lebih baik bagi pekerja-pekerja teknik dalam Perkhidmatan Awam pada masa itu. Pemimpin-pemimpin Kesatuan yang penuh dedikasi seperti mendiang Encik G. Leo banyak berusaha untuk memperbaiki nasib pekerja-pekerja teknik dari berbagai Jabatan Kerajaan. Jadi, tuan-tuan sungguh beruntung kerana mendapat pemimpin-pemimpin yang jujur dan berkebolehan dari dahulu hingga sekarang. Dari sejarah Kesatuan jelaslah bahawa pemimpin-pemimpinnya lebih menitikberatkan kepentingan ahli-ahlinya dan menjadikannya lebih terkenal dan dihormati.

Tuan-tuan dan Puan-puan,

Saya suka menyentuh sedikit mengenai hubungan Kesatuan dengan Rancangan Malaysia Kedua. Seperti kita sedia maklum, Rancangan ini telah memasuki pertengahan tahun kedua dan hanya tinggal 1,245 hari saja lagi. Sokongan dan kerjasama dari semua pihak sangatlah perlu untuk menjamin kejayaan Rancangan ini sepenuhnya.

Saya percaya ahli-ahli Kesatuan ini boleh memainkan peranan penting dalam Rancangan tersebut oleh kerana corak pekerjaan tuan-tuan yang khusus teknikal sangat perlu untuk melaksanakan projek-projek pembangunan kita. Memandang kepada luasnya scope pembangunan yang akan dijalankan dalam beberapa tahun ini, maka lebih banyak lagi pekerja-pekerja mahir dan ikhtisas yang diperlukan. Saya menggesa Kesatuan ini supaya menekankan kepada ahli-ahlinya agar lebih berdisiplin dan jujur dalam menjalankan tugas-tugas mereka.

Begitu juga Kesatuan ini boleh memberi tunjuk ajar kepada penduduk-penduduk luar bandar memandangkan usaha pembangunan yang begitu banyak di kawasan luar bandar yang memerlukan ramai pekerja-pekerja teknikal. Dengan cara ini, penduduk luar bandar akan dapat mengubah cara mereka berfikir dan mengambil sikap baru dengan tujuan membaiki kehidupan mereka supaya sejajar dengan kemajuan sektor moden.

Tidak payahlah disebut bahawa pekerja-pekerja mahir dalam bidang teknik sangat diperlukan oleh negara supaya terus meningkat maju selaras dengan kehendak-kehendak zaman sains dan teknologi sekarang ini. Kerajaan telah menyambut baik pendapat-pendapat Kesatuan dengan menitikberatkan lapangan teknikal dan penyelidikan supaya sejajar dengan kehendak zaman. Sebuah Kementerian yang bertanggungjawab dalam hal ini telah diadakan dan beberapa buah sekolah dan maktab seperti Institut Teknologi Kebangsaan dan Politeknik Ungku Omar telah didirikan dengan tujuan menambahkan lagi tenaga teknik untuk negara kita. Kementerian-Kementerian lain juga ada terlibat dalam usaha ini seperti Pusat Latihan Perusahaan di bawah Kementerian Buruh dan Tenaga Rakyat dan Instituti Teknologi Mara.

Tuan-tuan dan Puan-puan,

Saya mengambil peluang ini menyatakan penghargaan saya kepada Kesatuan yang terdiri dari pegawai-pegawai dan kakitangan dari berbagai Jabatan Kerajaan yang telah banyak memberi sumbangan kepada pembangunan negara. Saya berharap tuan-tuan akan terus menjalankan aktiviti-aktiviti Kesatuan dengan baik dan memberi perhatian berat terhadap kepentingan negara.

Saya sekali lagi mengucapkan tahniah kepada Kesatuan dan juga ucapan berbilang terimakasih kerana persiapan-persiapan yang meriah dan istimewa pada petang ini.

Dengan ini saya mengisytiharkan Bangunan Teknik ini dibuka dengan rasminya.